

INUIT ATAQATIGIIT INATSISARTUNI



09.01.2023

UPA2023/64

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Utoqqalinersiaqarneq pillugu Inatsisartut inatsisaat nr. 20, 23 november 2015-imeersup allangortinneqarnissaa siunertaralugu Naalakkackersuisut peqquneqarnissaannik Inatsisartut aalajangiiffigisassaattut siunnersuut. Allangortitsinermit utoqqalinersiaqartup aapparisaata isertai naapertorlugit utoqqalinersiaqarnissamut naatsorsuunneqartarnera atorunnaarsinneqassaaq.

(Inatsisartunut ilaasortaq Mariane Paviasen, Inuit Ataqatigiit)

Tungavilersuut:

Tamatta maani inersuarmitugut isumaqatigiissutigisariaqarparput utoqqartatta atugarisaat pitsaassuussasut atugassarititaasullu assigiissarneqarnissaat pisariaqartoq.

Taamaammat siunnersuutigaara utoqqalinersiaqartitsisarneq allangortinneqassasoq imaalillugu; utoqqalinersiat annertussusaat aappaqarneq kisimiittuunerluunniit apeqqutaatinnagu ingerlanneqassasut. Utoqqalinersiaqarneq pillugu Inatsisartut Inatsisaat nr. 20, 23 november 2015-imeersumi §5 najoqqutaralugu utoqqalinersiaqartup aapparisaata isertitai naapertorlugit utoqqalinersiat appartinneqartarput.

Utoqqalinersiaqartitsineq sivisuumik oqallisigineqarsimavoq, Naalakkersuisullu upernaakkut ataatsimiinnermi 2022-mi utoqqalinersiaqartunut utoqqalinersiat toqqammaviusut saniatigut ilanngaassinnginnermi aningaasat

INUIT ATAQATIGIIT INATSIARTUNI



tigummiinnagassat qaffassimavaat. Alloriarneq tamanna siulliuvoq pitsaasoq. Taamaattorli utoqqartatta atugassarisaat eqqarsaatigalugit iliuuseqarnerusariaqartugut isumaqarpunga. Aningaasanut Inatsisissamut partiit tamarmiullutik akuerseqataaffigisimasaanni tamanna aamma ersepoq.¹ Naalakkersuisut partiillu utoqqarnut periusissiaq suliarineqassasoq aammalu Aningaasanut Inatsimmut 2024-mi utoqqarnut tunngasunik iliuuseqarnissamut aningaasaliissallutik isumaqatigiissutigaa. Taamaakkaluartooq utaqqiinnarnanga tunuarsimaarnangalu utoqqartatta atugarisaasa pitsanngorsarnissaanut oqilisaataasinnaasumik siunnersuuteqarpunga.

Sooq taamak isumaqarpunga? Kialluunniimmi paasiuminaatittarunarpaa utoqqalinermi aappaqaraanni aapparisaq isertitai aallaavigalugit utoqqalinersiaqartitaasussaataaneq, taamak atugassaqaqtitsineq tassaammat assigiinngisitsineq. Taamatut utoqqalinersiaqartitsisarnitta utoqqarnut aningaasatigut ilungersunartorsiortitsinermik kinguneqartarpoq tamannalu akuersaarneqarsinnaangilaq. Aaqqissuuusaaq taamaattoq allaangilaq nunatsinni utoqqalinersiaqalernissaaq angugukku aappaqaruillu allaniit nalikinnerusutut inissiineq, inuiaqatigiisugullu ullumikkut killiffitsinni tusartuarterparput aappariilluni aapparisaq utoqqalinersiaqalernerata kingunerisaannik aappariit inooqatigiinniarnermikkut ajornartorsiulersartut allaat ilaanni aappariikkunnaarnermik kinguneqartumik.

Taamak atugassaqaqtitsineq inunnik immikkoortitseriviuvinnarani aamma allaffissornermik annertuumik pilersitsisarpoq, allaffissornermik killisaaniarluta suliniarnitsinni innuttaasut atugarisaannik oqilisaataasinnaasunik aamma nassaarsiortariaqarpugut, isumaqarpungalu utoqqalinersiaqartitsisarneq utoqqarnut tamanut assigiimmik atugassaqaqtitsinermik ingerlavinngorpat

¹ https://naalakkersuisut.gl/nyheder/2022/11/1411_finanslov?sc_lang=da

INUIT ATAQATIGIIT INATSIARTUNI



tamanna tamatsinnut oqinneruliinnarani aamma inuttut naleqassusermik qaffassaataallunilu, allaffissornikkullu akikillisaataassasoq.

Taamaammat maannangaaq siunnersuutigaara, Naalakkersuisut peqquneqassasut utoqqalinersiaqartup aapparisaata isertitai naapertorlugit utoqqalinersiaqarnissamut naatsorsuunneqartarnera atorunnaarsinneqarnissaannik suliaqaqqullugit.

Partiillu tamarmik qanoq isumaqarnerat tusassallugu qilanaaraara, qujanaq.

Pisortanut aningaasatigut allaffissornikkullu kingunerisassai:

Inatsisartut Suleriaasiat naapertorlugu par. 37 akissuteqaammut (009_2023)-mi allaffissornerup annikinnerulersinneqassasoq Naalakkersuisut akissutigaat.

Siunnersuut aapparisaq isertitai naapertorlugit naatsorsuutsilluni utoqqalinersiaqartitsineq atorunnaarsinneqarpat 6 mio. koruuninik akeqassasoq Naalakkersuisut §37 naapertorlugu akissuteqarput.

Namminersortunut aningaasatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.